

वस्त्रय इमे लोका असावादित्य एकविंश एष प्रजापतिः प्रजापतिरग्निर्यावान-
 ग्निर्यावत्यस्य मात्रा तावतैवैनमेतत्समिन्दे ॥ ३ ॥ यद्वैकविंशतिः । एकविंशो
 वै पुरुषो दश हस्त्या अङ्गुलयो दश पाद्या आत्मैकविंशः पुरुषः प्रजापतिः प्र-
 जापतिरग्निर्यावानग्निर्यावत्यस्य मात्रा तावतैवैनमेतत्समिन्दे ॥ ४ ॥ उभयीर्गायत्रीश्च
 त्रिष्टुभश्चान्वाह । तासामुक्तो बन्धुरुक्तम्वेवान्वृचः हिरण्यगर्भवत्याधारमाधारयति
 प्रजापतिर्वै हिरण्यगर्भः प्रजापतिरग्निर्द्वादशाप्रियस्तासामुक्तो बन्धुरुक्तम्वेवान्वृचं
 प्राजापत्यः पशुपुरोडाशो य एव पशोर्बन्धुः स पुरोडाशस्य द्वादशकपालो द्वादश
 मासाः संवत्सरः संवत्सरः प्रजापतिः कद्वत्यो याज्यानुवाक्याः को हि प्रजापतिः
 ॥ ५ ॥ अथैतं वायवे नियुवते । शुक्लं तूपरमालभते प्रजापतिः प्रजाः सृष्ट्वानुव्येक्ष-
 त तस्यात्यानन्देन रेतः परापतत्सोऽजः शुक्लस्तूपरो लप्सुद्यभवद्रसो वै रेतो
 यावानु वै रसस्तावानात्मा तद्यदेतमालभते तदेवाग्निरेतं पर्येति शुक्लो भवति
 शुक्लः हि रेतस्तूपरो भवति तूपरः हि रेतो वायवे भवति प्राणो वै वायुर्नि-
 युवते भवत्युदानो वै नियुतः प्राणोदानावेवास्मिन्नेतदधाति ॥ ६ ॥ यद्वैतं वायवे
 नियुवते । शुक्लं तूपरमालभते प्रजापतिं विस्रस्तं यत्र देवाः समस्कुर्वन्त्स यो
 ऽस्मात्प्राणो मध्यत उद्क्रामत्तमस्मिन्नेतेन पशुनादधुस्तथैवास्मिन्नयमेतदधाति वा-
 यवे भवति प्राणो वै वायुर्नियुवते भवत्युदानो वै नियुतः प्राणोदानावेवास्मि-
 न्नेतदधाति शुक्लो भवति शुक्लो हि वायुस्तूपरो भवति तूपरो हि वायुः ॥ ७ ॥
 तस्य सप्तदश सामिधेन्यः । सप्तदशो वै संवत्सरो द्वादश मासाः पञ्चऽर्तवः संव-
 त्सरः प्रजापतिः प्रजापतिरग्निर्यावानग्निर्यावत्यस्य मात्रा तावतैवैनमेतत्समिन्दे
 ॥ ८ ॥ यद्वै सप्तदश । सप्तदशो वै पुरुषो दश प्राणाश्चत्वार्यङ्गान्यात्मा पञ्चदशो
 ग्रीवाः षोडश्यः शिरः सप्तदशं पुरुषः प्रजापतिः प्रजापतिरग्निर्यावानग्निर्यावत्यस्य
 मात्रा तावतैवैनमेतत्समिन्दे ॥ ९ ॥ उभयीर्गायत्रीश्च त्रिष्टुभश्चान्वाह । तासामुक्तो